

YANKPAŊII

Ki jiin Yankpaŋii gbouŋ na po

Gbouŋ na tee yaniie ki joo nan poo yin ki want baa loon leeb bianjinba. Siab yaa joo nan poo na see Yennu nan u niib taar nie, ki leeb yaa li see Yiisa nan u weira taar nie. Baatusir ni, bi yi gbouŋ maŋe Soŋs.

¹ Solomonn yaŋ nba na mantik man ki gar yanii kura.

Sinsinn yaŋ

Poo lomm yaŋ

² Mootir n tankpinn,* kimaan a lomm man ki gar daama.

³ A nubiru man ki tee nan bonnunubit nae; ki a sann tee nan bi kpaar bonnunubit ki moon na.

Li ki tee birisuk kaa nan sapaamm na loona.

⁴ Jiin min, ki tin chiar yaat;

ki a sii tee n kpanbar, ki jii koo nanin a diiuk ni,

ki ti saa taan ki mok parpeenn, ki nyu gboo ki lon leeb.

Li ki tee birisuk kaa nan sapaamm kur loona.

⁵ Jerusalem poob, n bone, ŋaan mok fant,

n bonu tee nan Kedar niib lanbont

nba be kunkoouk paak bianjinba nae,

ŋaan fan nan jinjonii nba be kpanbar

Solomonn ŋaak ni na.

* **1:2** 1.2 Bi binbeŋ ni, bi din tee nna ki want lomm.

6 Daa goriin yanni, kimaan yonnue bonn n gbanant na.

N naa waas wutoa bo doo n paake,
ki bi te ki n tuun bi tilontii kpaant ni toona.
N ji ki mɔk yaak nan man ɲamm n mɔɲi.

7 N yɔɔk, betirin siaminba ki a saa saan nan a pei ki bin ɲman.

Lia nie ki bi saa saan ki foi yonsukenken ni?
Bee paake ki n sii lin loona pekpaarlei ni?

Jɔɔ lomm yaɲ

8 Fin sapaan-ɲanchintiliɲ na,
a ki mi maa kpaar pei siaminba-a?

Ii saa kii waa pei na taaboot;
a lon siaminba ki a saa kpaar a buunii,
ki lii kpia pekpaarii lanbont na.

9 N yɔɔk, a te jab niana nan tannaan nba tuu te
Faaro taanjalona nba daar taantorit na
niano bianɲinba nae.

10 A yut nba soon a kpianii ni,
ki sik a turu ni na fan nan tuliati nba ɲan nae.

11 Ti saa jii salimmɔna ki ɲmat nan salimpeena
ki ɲamm laamm ki tura.

Poo lomm yaɲ

12 Kpanbar kar u kok-foouk paake,
ki n tulaarii na nubiru man ki yent leɲ.

13 N yɔɔk na doo n biala paake,
ki nubir nan bonnunubit nba ki bi yi mir na.

14 N yɔɔk na tee nan tipuut nba be daan tiinii
kpaant
nba be Engedi bianɲinba nae.

Jɔɔ lomm yaɲ

15 N yook, a mantik fan bonchiann,
a ninbina na mantik nyirii ki mok lomm.

Poo lomm yaŋ

16 N yook, a mantik ŋan bonchiann; a mantik
maant n par.

Momaata nae sii tee ti doonu,

17 ki ti sii be kpekii nan naasei nyaka ni, ki
li tee ti ŋaak.

2

1 N tee nan tipuuk nba be Saronn tiŋ ni nae,
ki bia tee nan tipuuk nba be baauk ni na.

Joo lomm yaŋ

2 Tipuuk nba fan ki gar kunkonii bianŋinba na,
nnae ki n yook fan ki gar pooleeb.

Poo lomm yaŋ

3 Tilontii nba ŋan ki gar tilei bianŋinba na,
nnae ki n yook fan ki gar jaleeb.

N loon ki mii kaar u maasu, ki u loona na-ii man
n mob ni.

4 U jiin ki baar nanin u jeet dindiboor,
ki chaan lomm fariŋ n yur paak.

5 A jii tiloonkoona ki lin turin paŋ,
ki bia turin tiloonmɔna ki lin turin paŋ.

A niɔŋ te ki n baŋa.

6 N yur kpaak n yook niigaŋe, ki u niidiitu
barimin.

7 Jerusalem poob, satir mob nanin.

Ii sat mob, piarɔ nan kook nba tiin bonchiann
na sann ni
nan i kan te lomm n baar, ŋaan ki li yoo
daa ki baari.

Yaŋ nba pukin munlee

Poo lomm yaŋ

8 N gbat n yɔɔk kunkɔr.
U baat ki tiin jɔɔt ni, ki tiin kunkona paak, ki
baat n boor.

9 N yɔɔk tee nan kɔɔk koo pajak nba tee
biaŋinba nae,
ki see kpia jonn ki got gaan takoru ni, ki
gorii diiuk na ni.

10 Ki n yɔɔk maŋ ji piak nanin.

Jɔɔ lomm yaŋ

N yɔɔk, ii saana.

N yɔɔk, baat ki tin tɔk saan.

11 Siɔk gara, saak nyik baanuwa;

12 tipuuk yite tiŋ na ni.

Yoo nba na tee yanii yoee, ki ti gbia lanjerii
mɔnii kpaant ni.

13 Kinkana piin mɔnnuwa; ki wouŋ yent nan
tipuuk nubiru.

N yɔɔk, ii saana. N yɔɔk, baat ki tin tɔk saan.

14 A tee nan ŋmandajuuk nba borii tanfiat ni
biaŋinba nae.

ŋaant ki man la a ningorsin nba ŋan na,
ki bia te ki n gbat a kunkɔr nba man na.

15 Soot lunlona na ki turit, lunlona nba waar,
ki tee binba biir ti kpaant ni tilontii nba
yinn puuk na.

Poo lomm yaŋ

16 Mine yen n yɔɔk, ki u mun yenin.

N yɔɔk kpaar u pei titubira na ni.

17 Ki li-i taŋi yentir ki bunbɔnn na n bot,
n yɔɔk, chiat ki jen n boor yian nan kɔɔk
koo pajak nba tuu tiin jɔgbaak paak bi-
aŋinba na.

3

- ¹ Ki n doo gado paak nyotunmun,

ki kpaan daano nba ki n par lakib u paak;

ki lin lommɔ ɲaan ki lau.
- ² N ji saa fiire ki lin doo ni, ki got li sɔnjot ni

nan dai ni.

N saa kpaan daano nba ki n par lakib u paak

nae.
- Ŋanne ki n lin kpaano, ɲaan ki ki lau.
- ³ Ki nyiok guuteeb tan lan, yoo nba ki bi lin

gɔnt doo na na.

Ki n boib a, “I la n yɔɔk-ii?”
- ⁴ Maa gar guuteeb na yoo nba, ki n ji la n yɔɔk.

Ki n kubɔ, ki ji kan ɲaan ki wun yaat,

see ki n tan jiiu ki saan nana n naa ɲaak,

ki koo nana diiuk nba ki bi din marin na ni.
- ⁵ Jerusalem poob, satir mɔb nanin,

ii sat mɔb nan piaro koo kook nba tiin

bonchiann na sann ni

nan i kan te lomm n baar, ɲaan ki li yoo

daa ki baari.

Yaɲ nba puki muntaa

Poo lomm yaɲ

- ⁶ Wunba nyii kunkoouk po ki tee nan munyu-

tootir,

ki puk tulaarii nan bonnunubit nba tee mir,

ki tee tulaarii nba kur ki kpinkpenta koi na

tee ɲmee?
- ⁷ Solomonn-e baat, ki kar u naan kok paak, ki

bi jiiu,

ki Israel teeb kunkonkɔnjaana piinloob be

u boor.
- ⁸ Ki bi kur dia jukbanjai, ki mi konn fanu.

Ki soo kur dia u jukbanjiak,

ki teen siir ki guu kpikpiruk nba tan saa
mann baar nyiok.

⁹ Kpanbar Solomonn din jii daɗant nba nyii
Lebanonn-e,
ki ɗamm naan kok na.

¹⁰ U din jii salimpeenae ki pɔr li dasenta,
ki pɔr li musura po nan salimmɔna,
ki jii chab mɔnwuwur nba ki Jerusalem
poob nyar nan burchint na,
ki paan u kok na paak.

¹¹ Sayonn poob, baat ki tan barii kpanbar
Solomonn.

U yir naan fokirik nba ki u naa din yirimɔ, u
pookɔont daar nae,
ki li tee u parpeenn nan kpinkpammuk
daar na.

4

Jɔɔ lomm yaɗ

¹ N yɔok, a mantik fan bonchiann.

A ninbina nba ki saarik dɔok na nyirii nan
lomm,
ki a yut na lian ki tee nan buunii nba tuu
yab
ki nyi Gilead kunkonn paak ki siik biaɗinba
na.

² A nyana peen nan baa tuu koor pei ki wurib
biaɗinba na,
ki nan nyan-yenn na ki fokiti, ki li kur tɔɔ
leer paak.

³ A mɔgbana mɔne nan kpinkpamonn na.

Fi-i piak yoo nba, ki li mɔk fant.

A tankpina nba ki saarik dɔok nan nyiriie.

4 A turu tee nan Defid difoouk nba ki bi maar
 ki li fan nae,
 ki mək tuliat nba tee nan naagbankɔŋa tusire
 jɔɔn
 ki lint li kur po na.

5 A bīaa na tee nan piarii banlee di tutubira ni
 na.

6 N sii be bonnunubit nba ki bi yir mir na
 kunkonn paake,
 ki li-i taŋi yentir ki bunbɔnn na n bot.

7 N yɔɔk, a fan bonchiann, ki a siar po ki gbeen.

8 N pooyookir, a lakin tɔk nanin, ki tin nyi
 Lebanonn kunkona ni,
 a tɔk nyi nanin Lebanonn.

A nyi Amana kunkonn paak ki sik baar,
 ki bia nyi Senir kunkonn nan Hermonn
 kunkonn paak,
 ki li tee siaminba ki yanbɔra nan naamuut
 be na.

9 N pooloŋir, n pooyookir, a ninbina nan tuliat
 nba ki a lia na yent n dudukita.

10 N pooloŋir, n pooyookir, a lomm na manin,
 a lomm na ŋan gar daama,
 a tulaarii na nubiru man ki gar bonnunubit
 nba bewa.

11 N yɔɔk, siat manu na be a mɔgbana paak;
 a lamm na tee naabiin nan siate n boor.
 A liant na nubir nan bonnunubit kur nba be
 Lebanonn nae.

12 N pooloŋir, n pooyookir, a tee nan kpaab nba
 bɔr nae,
 ki tee nan kpaab nba ki bi maa joonn ki
 lintir,
 ki tee nan nyuntonn nba tee niyenɔkɔɔ yar
 na.

- 13 Leŋe ki bonbuburit bintir,
 ki kpaatir nan tilontii nba loon loonŋana,
 nan bonnunubit nba kur be.
- 14 Ki kadaak nan jangbadui nyɔr leŋ,
 nan kamantos tiinii nan kinkakimana nan
 poru
 nan bonnunubit booru kur nba be nyɔr leŋ,
 ki bonnunubit nba tee mir nan alos
 nan bonnunubit kur nba nubiru man be
 leŋ.
- 15 Ki nyuntona maant kpaab na,
 ki bunii nyun nyi Lebanonn kunkona ni
 ki puub nan paŋ ki kɔɔ kpaab na ni.

Poo lomm yaŋ

- 16 Niigaŋ po wouŋ, fiit.
 Niidiitu po wouŋ, damin n kpaab paak,
 ki te wamaasin n da nan nubiru nba man.
 Ŋaant ki n yɔɔk n saan u kpaab ni ki saa di
 tilɔɔna nba man.

Jɔɔ lomm yaŋ

5

- 1 N pooloŋir, n pooyookir, n kɔɔ n kpaab niwa.
 N pɔ n baarii nan bonnunubit nba tee mir nae;
 n di siat nan sagbente; n nyu tilɔɔna daame
 nan naabiin.

Poob lomm yaŋ

- N yɔɔsnba, ii di kii biaki nyu man nan yaa tan
 saa gboo.

Yaŋ nba pukin munna

Poo lomm yaŋ

- 2 N dɔɔr gɔɔne, ki damii damiit,
 ki li damiit ni ki n yɔɔk koon n tammɔb.

Jɔɔ lomm yaŋ

N yook, ɲaant man koo.
 N pooloɲir, a tee nan ɲmann nae n boor.
 Marin borik n yura, ki n yut borik nan sin-
 samiin.

Poo lomm yaɲ

³ N doɲ yokita; bee paake ki n saa ɲamm yoo?
 N wuur n taawa, bee paake ki n saa te ki lin ji
 jokin ni?

⁴ N yook tun u nuu gann fonn niwa,
 ki li maɲin nan waa nakinin na.

⁵ Ki n bo teen siir nan man te ki wun koo.
 Ki bonnunubit nba tee mir na por n nii,
 ki n niibira maan mir nyun, yoo nba ki n
 soor ganlootir na.

⁶ Ki n loot gann na ki tur n yook, ɲaan soo ki u
 doɲ yaata.

Ki n lek loon man gbat u kunkor. Ki n lin lomɔ,
 ɲaan ki ki lau.

Ki n yiu, ɲaan ki ki gbat ki u toon.

⁷ Ki nyiok guura na lin doo na ni ki tan lan, ki
 faan ki turin daɲ;
 ki guura nba be doo na jonn boor na liat
 n gbakit foouk.

⁸ Jerusalem poob, ii sat mɔb nanin nan li-i tee
 ki i la n yook na,
 i saa betɔ nan u niɔɲ te ki n baɲa.

Poob lomm yaɲ

⁹ Poo nba mantik fan ki gar poo kur na,
 a yook na mɔk bokitu nan jaleeb nba be
 nawa-a?

Bia bonte be u ni, ki teen bakitnaɲ,
 ki a loon ki tin sat mɔb nana ni?

Poo lomm yaɲ

¹⁰ N yook na ɲan ki bia mɔk paɲ,

u be u kooe, li-i tee ki a got niib tusaa piik ni.

- 11 U numpo tee nan kutmɔnt nae, ki ɲarii, ki u yut ɲan ki bɔn nan naakpaabɔɲ na.
- 12 Ki u ninbina fan nan ɲmana nba tuu be kpenu ni biaɲinba na, ki tee nan ɲmana nba ki bi wurib naabiin, ki bi see kpia kpenu na.
- 13 U kpianii na mɔk fant ki tee nan kpaab nba gbee nan kpinfraat nan baarii na.
Ki u mɔgbana tee nan tipuuk nba ki bi gbar mir tulaar-nyun na.
- 14 U nii na fan, ki u pir banii nba ki bi tabin tanbinyinyira li paak na.
Ki u gbanant na tee nan loobnyana nba ɲarii biaɲinba na, ki nyirii nan tanbinyinyira na.
- 15 Ki u pana tee nan tann nba chaa, ki tee jaantarik, ki bi sikinir salima toota ni na.
Ki u paɲ tee nan Lebanonn kunkona ni kpek-foot na.
- 16 Ki u mɔgbana na mɔɔtu* man; ki u gbanant kur po ɲan.
Jerusalem poob, n yɔɔk nba naan biaɲinbae na.

Poob lomm yaɲ

* **5:16** 5.16 Bi binbeɲ ni, bi din tuu mɔɔtir mɔgbanae ki li want lomm.

6

¹ Poo nba mantik fan ki gar poob kur na, a yook
na saan lee.

A betit sonu nba ki a yook na tōkin,
ki lin te tin fit somma ki a kpaano.

Poo lomm yaŋ

² N yook na saan u kpaab niŋa,
ki li tee siaminba ki tinunubit be na.
U kpaar u pei kpaab na nie, ki tikii puuk.

³ Mine yen n yook, ki u mun yenin;
u kpaar u pei titubira na nie.

Yaŋ nba pukin munŋmu sp Joo lomm yaŋ

⁴ N yook, a mantik fan nan Jerusalem nba fan
biaŋinba nae;
ki bia fan nan Tirsa doo na, ki a fant na
mantik teen jaarlituk.

⁵ Fi-i goriin, a niŋ tuu koome ki dian.

A yut na liane ki tee nan buunii nba tuu yab,
ki nyi Gilead kunkona paak ki siik biaŋinba
na.

⁶ A nyana na peen, ki tee nan peburuŋ nba ki
bi daa wurib nae;
ki nan nyan-yenn na ki fokiti, ki li kur tō
leer paak.

⁷ A tankpina nba ki saarik dook na nyiriie.

⁸ Kpanbar-i lekii mōk poosaakab piinloob nan
poobis piinniin,
nan sapaamm nba kaa kanni,

⁹ ŋaan fin kōoe ki n loon, ki a mantik ŋan ki tee
nan ŋmann na.

Fine tee a naa bonpoyemmir, ki tee a naa
bilonkak.

Ki poob kur goriia ki piaka;

ki poosaakab nan poobis yiin yanii ki kpak-
itira.

10 Ɔmee na, ki tan nyirii nan sanyiok na?

U mantik fan, ki yeen, ki tee nan yonnu,
koo ɲmaarik nba tuu nyokit bianjinba na.

11 N nyii tilontii boore ki sik maa n got tibis
nba be baauk ni na,
ki bia got fapaant nba be daan tilontii paak
na,
ki bia got tipuut nba be tilontlia paak na.

12 Fine te ki a niɔŋ kɔɔn,
ki n jekir nan taantoruk ɲmakit-tɔɔ nba
teen siir nan tɔb na.

Poob lomm yaŋ

13 Waan waak, Sulam sapaamo,
ɲaant ki tii goriia, faa waa waak na.

Poo lomm yaŋ

Bee paake ki i loon mii waa waak niib sinsuuk
ni, ki yii goriimi?

Jɔɔ lomm yaŋ

7

1 Sapaamo, a fant mantik paaka.

A taa na fan nan taasaat halii.

A pana fan nan tanbinyinyira nba ki gbanjabiro
tuu jab
ki li fan bianjinba nae.

2 A wurik tee nan bobir nba yɔɔ gbee nan
damanin na,
ki jekpekir be leŋ, ki tipuuk lintira.

3 A biala na naan nan pajaat nba nae,
ki bia naan nan kɔi banlee-e na.

4 A turu na tee nan baa tuu jii loobnyana ki maa
difoouk nae.

A ninbina na tee nan nyuntona nba be Hes-
 bonn doo ni,
 ki kpia digbangbenjir maŋ tammokookir
 nae.

A miana na mok ninbarisin,
 ki fan nan Lebanonn difoouk nba tor
 Damaskus po na.

⁵ A yur goone nan Kamel kunkonn na.

A yupiankar nyiriie nan chinchennyinyir na,
 ki li fant saa fit koon kpanbar niŋ.

⁶ A mok fant, ki ŋan bonchiann, ki gbee nan
 lomm.

⁷ Ki a gbanant ŋan ki tee nan kpinkparik na,
 ki a biao na fan nan kpinkpamona na.

⁸ N saa do kpinkparike, ki pɔɔr li loona.

Min yaa boor, a biao na tee nan daan tiloon-
 sokita nae,
 ki a foon nubiru man nan saana na.

⁹ Ki a mob tee nan damanin na.

Poo lomm yaŋ

A ji te ki daan na n saan n yook boor sinsonn,
 kii gaar u mogbana nan nyana paak.

¹⁰ N yooke yenin ki nianin.

¹¹ N yook, baat, ki tin nyi doo kpiŋ,
 ki saa doɔr digbanbis na ni nyiok na.

¹² Ti tan saa doŋ fiire ki got daan tilontii na,
 ki laan bi piin kpaatuwa-a? ki got laan
 tipuuk na pobitiri-i?

ki bia laan tilontlia na mok puuku-u?

Leŋe ki n saa tura n lomm.

¹³ Ki a saa gbat manfoor tiik na nubiru,
 nan tilona nba kur nubiru man ki li kpia
 ti tammob na.

N yook, n bir bonmankpera nan bonmanpaana,
 ki guuna.

8

- 1 N sunman ki a bo tee n naa bik nba moor n
naa biime,
ki mi-i cheta sonjouk ni, ki n saa fit moot a
tankpinn,*
ki soo baka sii kaa li po.
- 2 N saa jiia, ki saan nana n naa ngaak,
ki li sii tee siaminba ki a saa tumiin lomm.
N saa tura damanin nba ki n jii tiloona nyun ki
ngaa na ki a nyu.
- 3 N yur kpaak a niigaŋ paake, ngaan ki a niidiitu
barimin.
- 4 Jerusalem poob, satir mɔb nanin nan i kan te
lomm n baar,
ngaan ki li yoo daa ki baari.

*Yaŋ nba pukin munloob**Poob lomm yaŋ*

- 5 Ŋma poe nyii kunkoouk po, ki lon u yook nii
ki baat na?

Poo lomm yaŋ

N fiina, tilontik na nyakire, siaminba ki bi din
mara na.

- 6 A daa jikit a par ki teen soo, see min kuukoo;
a daa lor soo see min kuukoo.

Lomm mantik paar ki tee nan kuun nae;
ki niɔŋ mɔk paŋ ki tee nan kuun mɔŋ nba
tee biaŋinba na.

Li tuu tan yit ki tee muyeruko,
ki di nan muu nba tuu yabit ki di biaŋinba
na.

- 7 Ki nyun ki fit kpeent, nyunmɔnn ki be ki saa
fit kpeeniri.

* **8:1** 8.1 Bi binbeŋ ni, bi din tuu mootir leeb tankpinn nae ki
li want lomm.

Ŋaan li-i tee ki soɔ koor a wun daa lomm nan
 u mokinti,
 li joontu tan sii tee feie ki u saa la.

Poo maŋ ninjamm yaŋ

⁸ Ti waarɔ be, ki tee sapaanbik, ki u biaa daa
 waar.

Ti saa teenɔ nlee, li-i tee ki naasinbik baat ki
 daako?

⁹ Ti waarɔ na-i bonni tee dikpinn,
 ti bo saa maa salimpeena difoouko u paak.
 Ki u bonni biaki tee gann, ti bo saa chaan kpek
 taabiie ki kɔrɔ.

Poo lomm yaŋ

¹⁰ N tee dikpinne, ki n biaa na tee li ditootii.
 N yɔɔk mi nan mi-i be u boor, n tuu mok
 parmaasire.

Jɔɔ lomm yaŋ

¹¹ Solomonn mok sarwaaok siaminba ki bi yi
 Baal Hamonn na ni.

Kpaara be leŋ maŋ, ki u jikit u sarwaaok na ki
 teemm,
 ŋaan gaan salimpeenbina tusir tusir.

¹² Ki Solomonn tuu gaar salimpeenbina tusire,
 ki kpaara na mun tuu biar nan salimpeen-
 bina kobii ŋanlee-lee,
 ki li tee bi tora; ki n baka kaa. N mok n
 tiɔŋ sarwaauko.

¹³ N yɔɔk, a te man gbat a kunkɔr kpaab na ni;
 n kɔɔnanleeb na guua, a fan pak.

Poo lomm yaŋ

¹⁴ N yɔɔk, baat n boor; a tee nan kɔɔk
 koo pajak nba tuu be kunkona nba ki
 bonnunubit be leŋ nae.

Yennu Gbouŋ Mɔɔr
Bimoba: Yennu Gbouŋ Mɔɔr Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d